

# *NDZA SWI TIVA LESWAKU*

## *MUKUTSURI WA MINA WA HANYA*

 ...masiku yo kwetsima hinkwawo, leri hi rona siku, siku ra ku pfuka. Tanani kun'we hi ku tsaka ka mbilu, hikuva Wa hanya. Nakona U te, "Hikuva Ndza hanya, na n'wina ma hanya." Kutani i ntshembho wa njhani walowo, lowu hi nga wisaka ehenhla ka wona, mixo lowu.

<sup>2</sup> Sweswi ntsena loko hi nga se va na Hungu ra ni mixo, a hi korhamiseni tinhloko ta hina, ntsena ku yisa emahlwemi swintsongo, eka xikhongelo.

<sup>3</sup> Xikwembu lexi rhandzekaka, ha khensa mixo lowu, ku va vanhu lava nga vitanihi Vito ra Wena. Hi tsakile swonghasi leswaku a hi boheki ntsena ku anakanya, na swintsongo, hi ku pfuka lokukulu loku nga ta ta; hikuva ku hundzukile ka xiviri eka hina, tani hilaha hi nga ku hlaya eRitweni ra Wena, kutani hi vona leswaku Wena u swi tshembhisile leswi, na ku swi twa eka mimoya-xiviri ya hina, leswaku Yesu wa hanya... [Xivati lexi nga riki na nchumu eka thepi—Muhleri.]

<sup>4</sup> Oho, hi le ku ehleketeni, emixweni lowu, hi ku vava ka timbilu loku nga va kona evuton'wini, na magome lawa hi nga hundza eka wona, na mintokoto leyi nga hi handzulela, na ku hi cukumetela emimoyeni ya misava. Hilaha hi lahleke varhandziwa va hina hakona, nakona hi ririle esirheni. Nakona mimoya-xiviri ya hina—hina yi tikomba yi lava ku fa endzeni ka hina. Kambe, manuku, hi nga ha ehleketa hi namuntlha, oho, leswi swi vulaka swona leswaku Yesu u pfukile eku feni! U onhile matimba hinkwawo ya nala, loko A ta pfuka, a hlrile. U suserile mindzhuti hinkwayo ekule. Sweswi hi famba eku vonakaleni ko hlawuleka ka ku pfuka ka Yena.

<sup>5</sup> Oho, hi nga ha anakanya, khume nkaye wa madzana wa malembe man'wana, kumbe ku antswa, emixweni lowu, loko vavasati vambirhi lavantsongo va ri epatwini ra vona ku ya esirheni, va ri karhi va tivutisa leswaku i mani loyi a nga ta susa ribye. Kambe Xikwembu a ku ri khale xi ri susile. Nakona Loyi a khomeletiwile, a pfukile eku feni nakona u vulavurile na vona. A ku, "Fambani, mi ya byela vadyondzisiwa va Mina, na Petro, leswaku Ndzi ta hlangana na vona ehenhla le Galeliya."

<sup>6</sup> Oho, hilaha hi Ku khensaka hakona hikokwalaho ka ntokoto lowu wukulu, leswaku hi nga ha mbhonyiela ku pfuka lokuya, nakona ku va ka xiviri eka hina tani hilaha a ku ri hakona eka vona emixweni luwa, hikuva U pfukile ku suka eku feni.

<sup>7</sup> Hi rivalele swidyoho swa hina na swihoxo swa hina, hinkwaswo leswi hi nga swi endla kumbe ku swi vula, kumbe hambi ku ri ku swi ehleketa, leswi a swi hoxekile, Hosi. Ha khongela leswaku U ta hi rivalela hikokwalaho ka swilo leswi. Nakona hi lemele, hi vuenti. Tshinela ekusuhi, mixo lowu. Oho, minkarhi yo tala U yimile emindzhutini, loko makhombo ya hina ya entile swonghasi.

<sup>8</sup> Loko Maria a hundzuluka esirheni mixo luwa, nakona a ri karhi a rila, kutani u twile Rito endzhaku ka yena, ri ku, "U rilela yini xana?" A ri endzhaku ka yena, ntsena a ri karhi a langutisa leswi a swi ri karhi swi teka ndhawu. Kute loko A vurile vito ra yena, hilaha mbilu ya yena yi nga vaka yi tlulerile ehenhla hi ntsako hakona, hikuva Hosi ya yena a yi pfukile eku feni.

<sup>9</sup> Oho, vulavula na hina mixo lowu, Hosi. Hi nyiketi Rito ra Wena na Moya wa Wena. Nakona hi tshembhise, hi vuntshwa, mixo lowu, tani hi loko hi vulavula hi vaprofeta na lavo hambana-hambana lava yimeleke nkarhi lowu wukulu.

<sup>10</sup> Nakona hi yimela ku pfuka ka mani na mani emasikwini yo hetelela, loko Hosi ya hina yi ta ta nakambe. Kukondza ku fika nkarhi walowo, Hosi, hi hlayisi eka rihanyu lerinene, hi tsakile, hi taleriwe hi ntsako, hi ri karhi hi titsakela. Nakona hi nga hanyi hi xinkwa ntsena, kambe hi Rito rin'wana na rin'wana leri humaka enon'weni wa Xikwembu, ingaku hi nga endla ku hanya ka hina. Hi nyiketi swona, Tatana, hikuva hi swi kombela hi Vito ra Yena, Loyi a pfukeke eku feni na ku nyika xitiyisiso xa ku pfuka ka hina. Amen.

<sup>11</sup> Loko ndzi ri karhi ndzi ta ku rhelela hi patu ntsena eka xinkadyana lexi nga hundza, nakona a ndzi ri karhi ndzi ehleketa, tani hi leswi swinyenyana a swi ri karhi swi yimbelela, i ximun'wana muni lexi xi nga xona namunthla! Endzhaku... Hilaha Paseka yi faneleke hakona! Endzhaku ka loko vuxika lebyikulu byo dzwihala na ku titimela byi hundzile, na hinkwaswo swidzedze swa xona swa gamboko na swin'wana na swin'wana, kutani ku tlava ku hatima ka dyambu. Kutani ku ta ka dyambu ku tisa vutomi lebyintshwa, ntshembho lowuntshwa, tinguva letintshwa, swibyariwa leswintshwa, swiluva leswintshwa. Swilo hinkwaswo swi ta evuton'wini. Hilaha munhu, hambi ku ri loyi a nga ri na Bibele yo hlaya, hambiswiritano a swi swi tiva leswaku ku na Xikwembu. Loko ntsena a nga kota ku hlaya ntumbuluko, hilaha wu fambaka na ku vuya; xixikana xa lembe i ku vambiwa; ximun'wana xa lembe i ku pfuka; nakona ntsena wu vona Xikwembu eka swilo hinkwaswo.

<sup>12</sup> Kutani a ndzi ri karhi ndzi ehleketa, tani hi leswi a ndzi ri karhi ndzi twa swinyenyana swa mina leswintsongo swi ri karhi swi yimbelela, ehandle ejarateni mixo lowu, tirhobini ta mina letintsongo, ntsena tani hi leswi ndzi swi rhandzaka. Ndzi

swi vitana swiya-ni-moya swa mina leswintsongo. Nakona ndzi humela ehandle kutani ndzi pfulela xiya-ni-moya xa mina, xa ni mixo, ku xi yingisela.

<sup>13</sup> Kutani, sweswi, ma wu tiva ntsheketo lowuntsongo wa rhobini. A xi ri xinyanyana lexintsongo xa buraweni, ku ya hi ntsheketo, kukondza ku fika Good Friday. Nakona a ku ri na Un'wana loyi a ri karhi a fa, a ri yexe, nakona a ku ri hava na un'we wo N'wi pfuna. Nakona A yimile a ri yexe. Kutani U beleriwile hi swipikiri, naswona exihambanweni. Nakona xinyenyana lexintsongo xa buraweni a xi ri karhi xi ringeta ku N'wi ntshuxa ku suka exihambanweni. Kutani xi hahela endzhaku na le mahlweni, ku ya eswipikirini, na le mitwени enhlokweni ya Yena, xi kumile xifuva xa xona lexintsongo xi tshwukile hinkwako hi ngati, kutani hi mpfhuka ka sweswo xi vile xo tshwuka.

Kutani ndzi ehleketele, “O Xikwembu, walowo i muxaka wa xitlhangu lexi ndzi xi lavaka.”

<sup>14</sup> Kutani loko mi nga xiyisisa rhobini leyintsongo loko yi ri karhi yi tixopa-xopa. Ntsena ehansi ka xiphemu lexiya xitsongo xa tinsiva, i vuntima, byi tinsiva ta yona hinkwato. Kambe xitlhangu lexo—lexo tshwuka xa yi sirhelela.

<sup>15</sup> Sweswo hi leswi ndzi swi lavaka. Swi nga ri na mhaka hilaha hi ringetaka ku va kahle hakona, hi tama hi ri vadyohi. Kambe ntsena xitlhangu lexiya xintsongo xo tshwuka hi xona ntsena lexi swi xi tekaka ku xi endla xi hambana na swinyanyana leswin'wana. Sweswo ntsena hi swona leswi swi tekaka ku hi endla lava hambaneke na misava, ko va ntsena lexiya xintsongo, xitlhangu xo tshwuka xa tintswalo ta Yena.

<sup>16</sup> Ha ta namuntha emixweni lowu wa Paseka, kukotisa mixo wun'wana na wun'wana wa Paseka hi langutela emahlweni eku, eku hlengeletaneni eku xeni loku ka dyambu ka ni mixo. Nakona ku vile nkateko wa mina, eka malembe yo tala lawa ya nga hundza, ku ta laha etabernakeleni na ku ta khuvula vanhu, na ku va chumayilela ku pfuka ka Hosi Yesu.

<sup>17</sup> Nakona tani hi loko ndza ha ri eku hlayeni, madyambu lawa ya hundzeke, hi nkarhi wa xidzedze, nakona a ndzi ri karhi ndzi ehleketa, “Xana hi wahi marito lama faneleke ku vuriwa, ni mixo, eka ntirho lowu wa ku pfuka?” Kutani mianakanyo ya mina yi wela ehenhla ka dyondzo leyi makwerhu wa hina a nga ha ku yi hlaya, ya Yobo kavanyisa ka vu19, na tindzimana ta—ta vu23 ku ya eka ya vu27. “Ndza Swi Tiva Leswaku Mukutsuri Wa Mina Wa Hanya,” ku vule Yobo. Kutani ndzi hlawurile sweswo ku va dyondzo.

<sup>18</sup> Kutani loko hi ri karhi hi ta, hikokwalaho ka yini hi ri eku teni? Hikokwalaho ka xikongomelo lexi, ntsena, leswaku hi ta kuma mintshembho leyintshwa.

<sup>19</sup> Hi le misaveni leyi lahawani, nakona ha swi tiva leswaku hi hanya emunyameni. Ntsena a hi fanelanga ku va tani hi ku anakanya swilo leswi, kumbe ku tivungunya hina vinyi, tani hilaha a swi ri xiswona, hikuva ha swi tiva leswaku hi hanya emindzhutini ya rifu. Nkarhi wun'wana na wun'wana loko hi twa ambulense yi ri karhi yi kalakala, loko hi hundza emasirheni, loko hi vona xibedlele, timpfi hinkwato, ta swi fungha emikhumbhulweni ya hina leswaku hi vanhu lava nga ekhombyeni, havumbirhi eka lavantsongo na lavakulu.

<sup>20</sup> Kutani hi ta emixweni wo tani hi walowo, ku ta hlengeleta mintshembho, mintshembho yin'wana leyintshwa ya leswi hi nga kona hikokwalaho ka swona, na leswaku swi xikongomelo. Nakona ndzi ehleketa leswaku lowu i nkarhi wo saseka swinene ku va hi ehleketa eka mintshembho leyi Xikwembu xi hi nyiketek yona. Sweswi hi lava ku kokela leswi, ku sungula, emiehleketweni ya hina, leswaku ku hava nchumu na wun'we lowu nga hi herisaka kukondza xikongomelo xa Yena Loyi a hi tumbuluxeke xi va xi fikeleriwile. Ku ngaka ku nga vi na nchumu. Hi endliliwile hikokwalaho ka xikongomelo.

<sup>21</sup> Kereke leyi yi akiwile lahawani hikokwalaho ka xikongomelo. Masungulo lawa a ya ceriwanga, na ribye ra yinhla ri vekeriwile, na switina swi—swi vekiwa emuawkini, na lwangu na vundzeni, a swi vekiwanga lahawani ntsena ku ta vona loko swi ta endleka. Swi vekiwile lahawani hikokwalaho ka xikongomelo, kumbe hikokwalaho ka xikongomelo.

<sup>22</sup> Kaya ra wena leri u tshamaka ka rona, a ri lo vekiwa lahaya hi mhangu, kumbe ku va munhu un'wana ntsena a hetu nkarhi. Kaya ra wena ri endliliwile hikokwalaho ka xikongomelo, ku tirhela xikongomelo.

<sup>23</sup> Loko u chayerile kunene, mixo lowu, lahawani, hi movha wa wena, movha luwa a wu lo endliliwile ntsena ku vona loko wu nga endleka. Switirhiswa a swi tlangisiwanga hi munhu. Swi vekiwile lahawani hikokwalaho ka xikongomelo, na ku tirhela xikongomelo.

<sup>24</sup> Xiambalo lexi u xi ambalaka, a xi nga ri xo vona ntsena loko ku ri leswaku munhu un'wana a nga endla nchumu wun'wana. A xi ri hikokwalaho ka xikongomelo.

<sup>25</sup> Swakudya leswi u swi dyaka, a swi byariwanga emisaveni ntsena ku swi vona swi kula. Swi endliliwile ku tirhela xikongomelo.

<sup>26</sup> Nakona Xikwembu a xi nga boheki ntsena ku endla nsinya leswaku ntsena wu va nsinya. Xi endlile nsinya hikokwalaho ka xikongomelo.

<sup>27</sup> Nakona Xikwembu a xi endlanga mina na wena, ntsena ku vona loko Xi ta kota ku swi endlile. Xi hi endlile hikokwalaho ka xikongomelo. Hikokwalaho, ku na xikongomelo xa ku va hina hinkwerhu hi ri lahawani. A wu lahawani ntsena ku va

xivumbiwa xin'wana xa ximunhu. U lahayani hikokwalaho ko va Xikwembu xi ku endlile hikokwalaho ka xikongomelo xin'wana. A wu lahayani ntsena ku ta dya swakudya leswi Xikwembu xi nga swi byala. A wu lahayani ntsena ku ta tshama endlwini leyi—leyi wanuna luya a nga yi endla, kumbe ku ambala xiambalo lexi munhu un'wana a nga xi endla. U lahayani hikokwalaho ka xikongomelo xo karhi. Swi nga ri na mhaka hilaha u nga ntsongo hakona, hilaha u nga nkulukumba hakona, hilaha u nga na nkoka hakona, kumbe hilaha u nga riki na nkoka hakona, u lahayani ku ta tirha xikongomelo.

<sup>28</sup> Ntsena tani hi leswi, rintiho ra mina ri nga lahayani hikokwalaho ka xikongomelo. Nwala wa mina erintihweni ra mina wu hikokwalaho ka xikongomelo. Tihlo ra mina, na xirho xin'wana na xin'wana xa mimiri ya hina, i xa ku tirhela xikongomelo. Nakona a xi vekiwanga lahayani ntsena ku ta vona leswi xi nga ta langutekisa xiswona loko a xi lo vekiwa laha, kambe xi vekiwile laha ku va xi tirhela xikongomelo xa xona. A ku ri kungu ra Vukwembu ra Xikwembu ku endla tano.

<sup>29</sup> Kutani loko ku ri leswaku hi vekiwile laha hikokwalaho ka xikongomelo, kutani a ku na nchumu lowu nga hi herisaka kukondza xikongomelo xa Xikwembu xi fikeleleka. A ku na nchumu lowu nga hi vavisaka kukondza xikongomelo xexo, lexi Xikwembu xi nga hi veka lahayani hikokwalaho ka xona, xi ta va xi vonakarisiwile. Swi nga ri na mhaka leswaku hi na khombo ro tani hi kwihi, leswaku i ku vaviseka ka timbilu kumbe mahlomulo mangani lawa hi hundzaka eka wona, hinkwaswo ka leswi i swivangelo, nakona ku na xivangelo xa swona.

<sup>30</sup> Hi ta teka, eka xikombiso, Nowa, eBibeleni. A ku ri na ndhambhi leyi nga ta, naswona misava hinkwayo yi herisiwile. Swimilana na swilo hinkwaswo swi herisiwile handle ka Nowa na mbewu leyia nga yi nghenisa engalaveni.

<sup>31</sup> Xikongomelo xa Xikwembu xi nge pfuki xi hluriwile. Ku hava nchumu lowu nga xi hlulaka. Swingaleswi xana a hi fanele ku va hi tsake njhani namunlhia, ku va hi wisile ehenhla ka nhlavutelo luwa wo saseka wa Rito ra Xikwembu lexi hanyaka, leswaku a ku na swilo leswi nga kona, hambi ku ri swilo leswi swi nga taka. A ku na vuvabyi, a ku na nhlomulo, a ku na rifu, a ku na makhombo yo chavisa, a ku na nchumu lowu nga ta hi hambanisa ku suka eka xikongomelo xa Xikwembu lexi hanyaka. Leswi Xikwembu xi nga swi anakanya emiehlekeweni ya Xona, leswi Xikwembu xi nga swi kunguhata embilwini ya Xona, ku swi tisa eku humeleleni; a ku na dimoni, a ku na matimba, a ku na nchumu lowu nga hambanisaka lerikulu leri nga fiki ra Xikwembu, kungu leri nga Heriki. Ri fanele ku va hilaha Xikwembu xi nga vula hakona.

<sup>32</sup> Kutani hi kuma, leswaku emasikwini lawa misava hinkwayo a yi ya eku herisiweni hi ndhambhi, leswaku Xikwembu xi

endlile vululamiselo. Vululamiselo bya xivangelo muni? Ku hlaysia xikongomelo xa Xona. Xi swi endlile emasikwini ya Nowa.

<sup>33</sup> Nakona Xi le ku swi endleni namuntlha. Xi endlile vululamiselo, ku hlaysia ku ya eka xikongomelo xa Xona n'winyi. Xi ta hlaysia Kereke. Xi ta hlaysia vanhu. Xi ta hlaysia malandza hikokwalaho ka mfumo wa Xona lowukulu, lowu rifu ri nga taka ri nga wu herisi. Kutani ha swi lemuka leswaku swi hi ripfumelo ku va hi pfumela leswi, kambe ku pfuka ku tswala masungulo lawa ya tiyeke laha ripfumelo ra hina ri wisaka kona. A ku na nchumu lowu nga ri herisaka. Tani hilaha muphati a nga tshama a tsala leswaku:

Oho, i ku ringela emahlweni ka njhani ka ku  
kwetsima ka Vukwembu!  
Mudyandzhaka wa ku ponisiwa, loyi a  
xaviweke hi Xikwembu,  
U tswariwile hi Moya wa Xona, a hlantswiwa  
hi Ngati ya Xona.

<sup>34</sup> I xitiyisiso muni, ehenhla ka Ribye leriya ro tiya, ku pfuka ka Murhandziwa wa hina loyi a rhandzekaka, Hosi Yesu. A ku na nchumu lowu nga xi herisaka. Xi byariwile. Hi xona Mbewu ya Xikwembu. Hi xona xikongomelo xa Xikwembu ku hi nyika Moya lowo Kwetsima lowu katekisiweke. Hi xona xikongomelo xa Xikwembu ku hi komba swikombiso na masingita na mahlori. Hi xona xikongomelo xa Xikwembu, naswona a ku na nchumu lowu nga xi herisaka. Matimba hinkwawo ya tihle ya nga ha beja ku lwisana na xona, kambe xi ta hlula. Hi na xitshembhiso lexi nga Heriki xa Xikwembu. Ku nga ha va ku ri na vadyondzisi, ku nga ha pfuka tiism, ku nga ha pfuka minonganoko leyikulu, ku nga va ku ri na swilo leswi langutekaka tani hi loko xi ta herisiwa, kambe xi nge pfuki xi herisiwile. Hi xona xikongomelo xa Xikwembu ku vona leswaku xi ta hlula. Kutani, a swi le ka mina, naswona a swi le ka wena, hambi xi ta herisiwa kumbe xi nga herisiwi. Swi le ka Xikwembu. Nakona hi nga wisa hi tiyisisiwile eka swona, leswaku Xikwembu xi nge pfuki xi tshikile ndzhaka ya hina yi herisiwa, hikuva hi xona xikongomelo xa Xona ku hi nyika yona.

<sup>35</sup> Sweswi hi nga ha ehlleketa, nakambe, namuntlha, ehenhla ka vuherisi, lebyi ringetaka ku herisa. Hi na xitshembhiso xa Kreste hi yexe.

<sup>36</sup> Hi ehlleketa hi vana va Vaheveru, loko Xikwembu xi vile na xikongomelo hikokwalaho ka vona. Loko va ha ri le hansi eBabilona, nakona khele ra ndzilo a ri hisiwile ka nkombo ku tlula hilaha ri nga tshama ri hisiwa hakona, ku ta herisa xikongomelo xa Xikwembu. Nakona Babilona hinkwaro a ri pfukile hi vukarhi. A va tiyimiserile, Sathana a tiyimiserile, ku herisa xikongomelo xa Xikwembu, hikuva a swi tiva leswaku

vana lavaya a va ya nghena ekheleni ra ndzilo. Swingaleswi u endlile khele ra ndzilo, loko va ri hisile, ku hisa ka nkombo, ku tiyisisa leswaku nongonoko wa Xikwembu wu ta herisiwa. Kambe Xikwembu a xi lava ku kombisa matimba ya Xona, nakona Babilona hinkwaro na tihele hinkwato a swi nga ta xi hlula xikongomelo lexiya. Ee, nkulukumba. Swi nga ri na mhaka loko ku ri leswaku a va ta va va hisile khele leriya ra ndzilo ka miliyoni, a ri ta va ri nga kalanga ri xi herisa xikongomelo xa Xikwembu. Xikwembu a xi lava ku kombisa leswaku a Xi ri Xikwembu xa ku ntshuxeka, nakona Xi ta tisa ku ntshuxeka eka mani na mani loyi Xi tsakelaka ku n'wi tisela kona, nakona a ku na nchumu lowu a wu ta nghenelela nongonoko wa Xona.

<sup>37</sup> Swingaleswi loko va hisile khele ra ndzilo, i swintsongo leswi Xadrak, Mexak na Abednigo va nga swi tiva leswaku a va huma ekheleni leriya ra ndzilo. Hikuva va vurile, vona vinyi, “Xikwembu xa hina xa swi kota ku hi ntshuxa. Kambe, hambiswiritano, hi ngaka hi nga xi khinsameli xifaniso.” Xikwembu a xi ri na un’wana loyi a ta Xi tirhela, nakona xikongomelo xa Xona a xi nga ta hluriwa. Ndzilo wu ngaka—wu ngaka wu nga xi hluli xikongomelo xa kungu ra Xikwembu.

<sup>38</sup> Kutani, oho, hilaha ndzi rhandzaka ku vula leswi, mixo lowu. Hinkwato tibomo ta hayidrogen emisaveni ti nge pfuki ti hlurile ku pfuka ka Kereke ya Xona. Hinkwako ku hlamuselela ekule, na tinhlayo hinkwato, na—na swin’wana na swin’wana, leswi misava leyи ya vutlharhi yi nga swi tumbeta, hi xikongomelo xa yona ku ta endla swin’wana hi mayelana na swona, ku herisa ripfumelo ra vana va Xikwembu, a swi nge swi koti. Ripfumelo leriya ri ta hanya ku ya emahlweni hi misiku.

<sup>39</sup> A ku ri xikongomelo xa Xikwembu ku kombisa leswaku a Xi ri na matimba ehenhla ka swivandzana swa nhova ya masimu. Nakona va vekile tinghala tin’wana ebakweni nkarhi wun’wana. Nakona va ti sikisile hindlala kukondza ti va na ndlala swonghasi, lero a ti ta va ti handzurile munhu a—a va swiphemuphemu, ntsena hi ku vutla kan’we. Nakona javulosi a ehleketa, “Kunene, ndzi ta kota ku herisa muprofeta loyi, Daniel.”

<sup>40</sup> Kambe Daniel a ri na xikongomelo embilwini ya yena xo endla xikongomelo xa Xikwembu. Nakona Xikwembu a xi vekile sweswo embilwini ya yena. Loko Daniel a nga se va na ku navela loku, a ku fanele ku va na nchumu wun’wana wo tumbuluxa ku navela kwaloko. Loko a nga se va na ripfumelo rero, a ku fanele ku va na nchumu wun’wana wo n’wi byela leswaku ku na Xikwembu lexi a xi ta kota ku ntshuxa.

<sup>41</sup> Kutani, oho, hilaha sweswo swi kotlanaka mixo lowu, na ripfumelo, ripfumelo leri hanyaka ra Xikwembu lexi hanyaka, eKerekene ya Xona. Ku na nchumu wun’wana etimbilwini ta hina lowu vulavulaka leswaku ku na Tiko entsungeni wa nambu.

Ndzi ngaka ndzi nga veki rintiho ra mina eTikweni rero, na hambi a ri mani na mani, kambe ku na nchumu wun'wana endzeni ka hina lowu hi byelaka leswaku:

Sirha a hi xikongomelo xa rona;  
Nakona u ntshuri, u ta tlhelela entshurini,  
A swi vuriwangka eka moyo-xiviri.

<sup>42</sup> Ku na nchumu wun'wana endzeni ka hina, ndzilo lowu pfurhaka, rivoni leri nga lumekiwa hi Xikwembu, nakona a ku na rimoyana leri nga ta ri tima. A ku na maxele yo titimela ku tlula mpimo ekerekeni, a ku na nkala-ntsakelo exikarhi ka vanhu, a ku na nxaniso wa misava, lowu nga timaka langavi leri Xikwembu xi nga ri lumeka. Hikuva i xikongomelo xa Xikwembu leswaku rivoni ra Xona leri nga lumekiwa ra ntshuxeko ri ta pfurha kukondza ku fika ku Vuya ka Hosi, nakona a ku na matimba lawa ya nga ta ri tima. Ntsena ma ta ri endla leswaku ri pfurha hi ku vangama lokukulu loko ma ri karhi ma hunga. Swi khorwisiwile hi ku hundza ka tinguva leswaku nxaniseko wu tiyisa Kereke.

<sup>43</sup> Kutani Daniel, a nga ri eku switiveni ka hilaha Xikwembu a xi ta swi endla hakona, nakona a nga ri eku swi tiveni loko ku ri leswaku Xikwembu xi ya eku swi endleni, kambe a swi tiva leswaku a Xi swi kota, naswona, ku swi endla, na ku va a tiva leswaku nchumu wun'wana ehansi le ndzeni ka yena wu n'wi byerile tano. Wa vona, Xikwembu a xi ri na xikongomelo. A xi ri na swilo hinkwaswo swi ri karhi swi tirhela eka xikongomelo xexo.

<sup>44</sup> Kutani hinkwerhu, namunlhha, swi nga ri na mhaka leswaku hi languteka hi ri na nkala-ntsakelo ku fika kwihi eka minkarhi yin'wana, na hilaha swilo swi fambaka hilaha ku nga tovelekangiki hakona, na hilaha Kereke yi nghanaka eka xiyimo *lexi* na xiyimo *xexo*, hinkwaswo i xikongomelo xa Vukwembu xa Xikwembu ku hi vumba na ku hi endla hi ndlela ya Xona N'winyi. I mani loyi a tivaka ku khavisa xingolongondwani ku tlula Mutumbuluxi?

<sup>45</sup> Kutani tinghala a ti nga ta n'wi dya muprefeta, hikuva Xikwembu xi rhumerile Ntsumi. A xi ri na Ntsumi ley i yimeke kwalahaya ku sirhelela muprefeta loyi, hikuva Xikwembu a xi ri na xikongomelo. A xi lava ku kombisa hosi liya yi tinyiketeke vito hi yoxe voko ra Xona ra matimba na xikongomelo xa Xona.

<sup>46</sup> Ndzi ehleketa leswaku sweswo hi leswi nga eku humeleleni namunlhha, leswaku Xikwembu xi le ku lulamiseleni ka vanhu, leswaku Xi ta kombisa voko ra Xona ra matimba, ku fikelela xikongomelo xa Xona xa matimba. Oho, ndzi tsakile swonghasi, mixo lowu, leswaku Xa hanya embilwini ya mina, leswaku a hi Xona Xikwembu lexi nga fa. Hi xona Xikwembu lexi hanyaka. Nakona le hansi-hansi endzeni ka mina . . .

<sup>47</sup> Tolo ni mixo, a ndzi tshamile exitulwini xa mutsemeti wa misisi, ku ya tsemeta misisi. Nakulorhi lontsongo a ri karhi a tsemeta misisi ya mina, ehansi exitolo xa Makwerhu Egan. Nakona a ndzi lo titshamela kwalahaya, na nhloko ya mina yi korhamile. Nakona, oho, a ndzi karhele swonghasi. Tinhlengeletano ta mina ti vile to leha swonghasi, nakona ndzi le ku ringetenka ku ya ekule, ni mixo, ku ya wisa swintsongo loko ntirho lowu landzelaka wu nga se sungula. Nakona a ndzi karhele swonghasi, ntsena a swi tikomba tani hiloko mbilu ya mina yi ta yima ku ba. Kute loko ndza ha tshamile kwalahaya, hi xitshuketa, a ndzi kota ku twa un'wana na un'wana a ri karhi a vulavula, kambe a swi tikomba tani hiloko ndzi ri ehandle empfhukeni.

<sup>48</sup> Ndzi ehleketele, "Xana ndzi vile na nhlaselo wa mbilu, nakona ntsena ndzi le ku sukeni exitulwini lexi xa mutsemeti wa misisi?" Ndzi ehleketele, "Ndza tivutisa loko sweswo ku ri leswi tekaka ndhawu?" Ndzi twile mavoko ya mina; a ya ri na vusindza. Kutani mbilu ya mina a yi tikomba tani hiloko yi ri karhi yi yima ku ba. Kutani ndzi ehleketele, "Oho, kambe ku na Evhangeli leyi faneleke ku chumayeriwa. Nakona a ku na matimba lawa ya nga ndzi tekaka kukondza xikongomelo xa Xikwembu xi fikeleriwa."

<sup>49</sup> A ku na nchumu lowu nga ndzi vavisaka, ku hava nchumu, kukondza xikongomelo xa Xikwembu xi fikeleriwa. Kutani loko xexo xi fikeleriwile, ndzi lava ku famba na xikongomelo xa Xona. Loko Xi hetile, kutani ndzi hetile, na mina. Loko Xi hetile hi mina, mina ndzi hetile hi vutomi.

<sup>50</sup> Loko Xi hetile hi wena, u herile, na wena. Swingaleswi hi kwihi ku hambana loku swi ku endlaka? Xikwembu xi swi khoma hinkwaswo evokweni ra Xona. Hambi hi ri lavantsongo kumbe lavakulu, a hi swi tivi leswaku xikongomelo xa Xikwembu xi ta fikeleriwa na ku hetiwa rini. Xikwembu xi teka vana lavantsongo, nkarhi wun'wana, ku kombisa leswaku Xi nga ha letela moya-xiviri lowuntsongo wa vona. Swin'wana na swin'wana leswi Xi swi endlaka swi na xikongomelo. Xi te, hambi ku ri xindzingiri xi ngaka xi nga wi ku suka hi le tilweni, handle ko va Xona xi swi tiva. Swin'wana na swin'wana swi famba hikokwalaho ka xikongomelo xa Xona, ntsena hi awara ya kona na nkarhi wa kona. Hinkwaswo swi le ka kungu ra Xona ra Vukwembu. A ku na nchumu lowu nga swi herisaka.

<sup>51</sup> Hilaha a ku ri xitiyisiso hakona eka Abraham, endzhaku ka loko a kumile Xikwembu, na ku swi tiva leswaku Xikwembu a xi ri na xikongomelo. Leswaku, eka xikongomelo lexi, a Xi ya eku tiseni, hi Abraham na Sarah, jaha. Nakona hi jaha leri, Isak, a ku ta ta Hosi Yesu. Nakona eka xikongomelo lexi, a Xi ri karhi xi humelerisa Sarah na Abraham, nakona a xi ya eku va endleni vanhu lavakulu na ku tisa jaha leri; ku teka vanhu va xiyimo xo biha ku tlurisia lava nga va ka kona, ku swi endla hi vona.

<sup>52</sup> Hilaha swi nga tolrevelekangiki hakona, leswaku Xikwembu xi famba hi tindlela ta mihihlo! Kunene, a swi languteka tani hi sweswo, loko ku ri leswaku a Xi lava ku tisa n'wana, emisaveni kukotisa xisweswo, a Xi ta va xi kumile wansati loyi a tswalaka. A swi languteka tani hiloko a Xi fanele ku va xi kumile wanuna un'wana loyi a nga riki ngon'wa. Tani hi Abraham na Sarah, a va tekanile eka yo tala, malembe yo tala, nakona wansati a ri mhika. A nga ta n'wi kurisa n'wana. Kunene, a swi languteka tano, manuku, a Xi fanele ku va xi kumile wansati lontsongo loyi a tswalaka, loyi a ta va a tisile n'wana loyi. Kambe Xikwembu xi tsakela ku kombisa tintswalo ta Xona. Xikwembu xi tsakela ku teka nchumu wun'wana lowu nga riki nchumu kutani xi endla nchumu wun'wana hi wona, hikuva hi Xona Mutumbuluxi.

<sup>53</sup> Hikokwalaho Xi tekile mina na wena. A hi nga ri nchumu, leswaku Xi ta endla vana va Xona N'winyi, ku huma eka hina lava a va ri na makhombo, na ku hlupheka, na ku lahleka, na ku va mabofu, na ku ka hi nga rhandzeki, ku hi endla vana va Xona lava rhandzekaka. I xikongomelo xa Xikwembu ku endla tano.

<sup>54</sup> Kutani, nakambe, a swi languteka tani hiloko Xikwembu a xi ta va xi tekile wansati lontsongo na wanuna lontsongo, ku va xi endlile leswi, wansati lontsongo na wanuna lontsongo lava nga ha ku tekana. A xi ta va xi te, "Sweswi, a mi va nga na vana. Nakona Ndzi ta mi kumela, jaha ra n'wina ro rhanga ku tswariwa, nakona Ndzi ya eku... U ta va Isak wa Mina."

<sup>55</sup> Kambe Xikwembu xi langhile wanuna wa makume nkombo-ntlhanu wa malembe hi vukhale, na wansati wa makume ntsevu-ntlhanu, ku endla xikongomelo xa Xona, ku kombisa leswaku u nga hava u ri havumbirhi lontsongo kumbe lonkulu, Xikwembu xi nga swi endla, nakona xi ta swi endla, ku tirha xikongomelo xa Xona. Hakunene. Kutani loko Abraham a ri na makume nkombo-ntlhanu, u kumile xitshembhiso xa Xikwembu. U xi byerile Sarah.

<sup>56</sup> Kutani sweswi javulosi a ku, "Wa swi tiva ku ri i yini? Ntsena ndzi ya eku hlweriseni ka sweswo xinkadyana. Ndzi pfumela leswaku loko ndzo va endla va dyuhala swonghasi, va ta lahla ripfumelo, nakona va ta swi tiva leswaku a swi nge humeleli. Loko ku ri khale va ri karhi va rhurhumela eka makume nkombo-ntlhanu; loko ntsena ndzo veka sweswo ekule swa xikadyana!" Kutani u swi vekile ekule kukondza Abraham na Sarah va voyama hi vukhale, timpfi na makatla yo voyama.

<sup>57</sup> Swi fambela ku ya kombisa leswaku a ku na nchumu lowu nga hlulaka xikongomelo xa Xona. Hambi ku ri rifu ri ngaka ri nga xi hluli xikongomelo xa Xona. "Abraham a ri kahle ku fana na loko a file." Nakona xivelekelo xa Sarah a xi file ku ringana makume mune kumbe makume nthhanu wa malembe, kambe a ku na nchumu lowu nga hlulaka xikongomelo xa Xikwembu. Miri wa yena a wu dyuharile; a wu khonyanile; minsiba ya masi

a yi omile. Mbilu ya yena a yi tsanile swonghasi a yi nga ta hundza eku tswaleni. Kambe Xikwembu xi hi tivisile lahaya, leswaku xikongomelo xa Xona xi ngaka xi nga hluriwi. Xi cincile Sarah, kutani xi n'wi endla wansati lontsongo nakambe. Kutani xi teka wanuna, wa dzana ra malembe hi vukhale, kutani xi n'wi tlherisela eka vuntshwa bya yena.

<sup>58</sup> Swi nga ri na mhaka hilaha swi langutekaka swi nga twisiseki hakona, Xikwembu xi nyikile xitshembhiso. "Kutani Abraham a nga dedelekanga eka xitshembhiso xa Xikwembu, hi ku kala ripfumelo; kambe u tiyile, a nyika Xikwembu ku dzunisa, hikuva u avanyisile Xona, leswaku a Xi swi kota ku endla leswi Xi nga swi tshembhisa."

<sup>59</sup> Kutani xana hi fanele ku va yini mixo lowu? "Hi vana va xitshembhiso xa Xona. Hina ku va hi file eka Kreste, hi Mbewu ya Abraham, nakona hi vadya-ndzhaka na Yena, hi xitshembhiso." Kutani, a swi na mhaka leswaku i vuvabyi byingani lebyi taka, leswaku i rifu ra muxaka muni leri hi faka rona, leswaku i vusweti byo tani hi kwihi lebyi hi hundzaka eka byona, xikongomelo xa Xikwembu xi ngaka xi nga hluriwi. Xi ta tlhela xi hi pfuxa nakambe. "Hikuva Ndza hanya, na n'wina mi ta hanya." Walowo i ntshembho wa hina.

<sup>60</sup> Loko ndzi swi tiva, namutlha, ku va ku ri siku ra mina ro velekiwa, nakona ndzi le ku khalabyeni. Ndzi tilangutisa enghilazini kutani ndzi vona leswaku xifanyetana lexiya, lexi nga aka tabernakele leyi, a xa ha ri xifanyetana nakambe. Xi le ku hundzukeni ka mukhalabya, makatla yo voyama, malevhу ya hundzuka mpun'wa, misisi yi humela ehandle, kambe a ku na nchumu lowu nga hlulaka xikongomelo xa Xikwembu. A ku na nchumu lowu nga swi kotaka! Swingaleswi ndzi wisa ndzi tiyisisiwile ehenhla ka xitshembhiso, "Hikuva Ndza hanya, na n'wina mi ta hanya." Ndzi tihlanganisa na Yobo wa khale, "Ndza swi tiva leswaku mukutsuri wa mina wa hanya, nakona hi siku ro hetelela U ta yima emisaveni." I xikongomelo lexi Xikwembu xi nga na xona. Ndzi fanele ku tirhela xikongomelo lexi. Vutomi bya mina hinkwabyo byi fanele ku tisiwa eka xikongomelo xa Xona, na le ka nonganoko wa Xona. Un'wana na un'wana wa hina u hi ndlela yaleyo. Xikwembu xi na xikongomelo ku ya laha . . .

<sup>61</sup> Mukhalabya Abraham a ta—a ta tiyisela, tani hiloko a vona Yena Loyi a nga vonakiki, hikuva a xi ri xikongomelo xa Xikwembu, leswaku a tiva leswaku Xikwembu xi n'wi nyikile xitshembhiso. Swona, swi nga ri na mhaka hilaha a swi languteka swi hambanile hakona, Xikwembu xi nyikile Abraham xitshembhiso xexo. Swingaleswi, Xikwembu xi fikelerile xitshembhiso xa Xona. Xi swi endlile, eka Abraham. Xi swi endlile, eka vana va Xona hinkwavo. Nakona Xi ta hlaysia xitshembhiso xa Xona.

<sup>62</sup> A ku ri Muxe, loko a ta va a dyondzisiwile eka vutlharchi hinkwabyo bya Vaegipta, loko a ta swi tiva leswaku Xikwembu xi na xikongomelo eka vutomi bya yena.

<sup>63</sup> A ku ri Yokebed, mana wa yena, loyi a nga teka n'wana wa yena wa xirhandzwa, n'wana wo saseka ku tlurisa emisaveni hinkwayo, hi nkarhi luwa, nakulorhi lontsongo wo xonga; kutani a n'wi hoxa engalaveni kutani a n'wi susumetela ehandle endzeni ka Nile, laha tingwenya a ti nyuhwerile hi swihlangi swa Vaheveru, hikuva a va va phamela eka tingwenya. Kutani u tekile n'wana wa yena kutani a n'wi susumetela kwale handle etinhlayeni ta rifu, a ri karhi a tiva leswi, leswaku xikongomelo xa Xikwembu a xi nga ta hluriwa. "Xikwembu xa Abraham, hlayisa n'wana wa mina, nakona u n'wi tisa eka xikongomelo lexi U nga n'wi tisela xona." A ku nga ri na mati yo ringanelia eNile ku va ya n'wi nwerisa. A ku nga ri na tingwenya to ringanelia emisaveni hinkwayo leti a ti ta va ti n'wi mitile. A ri mulanghiwa wa Xikwembu.

<sup>64</sup> Kutani tani hi leswi a ri mulanghiwa wa Xikwembu, hikokwalaho ka xikongomelo xexo, hina hi valanghiwa va Xikwembu namuntlha, lava pfumelaka eka ku pfuka ka Hosi Yesu. Nakona a ku na tibomo, a ku na tihelle, a ku na nchumu wun'wana lowu nga herisaka xikongomelo xa Xikwembu. Hi fanele ku ya eku pfuxiweni. Hi xona xitshembhiso lexi hi nga na xona xa Xikwembu. Xikongomelo xa Xikwembu.

<sup>65</sup> Kutani, Muxe, loko a ta va a vile na makume mune wa malembe lawa ya heleleke hi vukhale, wanuna wa malembe ya le xikarhi, nakona a leteriwile exikolweni. Kambe Xikwembu xi na ndlela leyi nga nyikiwa, minkarhi yin'wana, ya ku humelerisa swilo swa Xona, leswi Xi nga swi tshembhisa. Hilaha Xi nga tlherisela Muxe etlhelo ra le ndzhaku ka mananga, kutani xi n'wi tshika a twa ku kalakala na minxaniso, loko a ri karhi a dedeleka le nhoveni. Kutani tani hi ku va le ndzhaku lahaya, a ri yexe emananga, na mimoya leyi kalakalaka, swipame na swivatlan-kombe, nakona, a ri yexe, ehandle le nhoveni, kukondza a lava ku lova. A ku na nchumu lowu nga hlulaka xikongomelo xa Xikwembu. Xikwembu a xi humelerisile Muxe, nakona Muxe a fanele ku endla leswi Xikwembu xi nga n'wi byela ku swi endla, hikuva xikongomelo xa Xikwembu xi ngaka xi nga hluriwi.

<sup>66</sup> A ku ri ximunhuhatwa xa hina, mixo lowu, Yobo, loyi loko a ri emaxangwini ya yena yo enta ku tlurisa, loko rifuwo ra yena hinkwaro ri sukile eka yena. Vana va yena a va file. Miri wa yena a wu hlaseriwile hi matshumba. Nakona a ri emaxangwini ya yena lamakulu ku tlurisa lawa a nga se tshamaka a va eka wona. A tshamile enhulwini ya nkuma, na xirhengele xa yena, a ri karhi a n'waya matshumba. Kutani nsati wa yena erivantini, "Hikokwalaho ka yini u nga rhukani Xikwembu kutani u fa?"

<sup>67</sup> Loko swirho swa kereke ya yena swi tava swi hundzuluxerile minhlana ya swona eka yena, ku ringana nkombo wa masiku, swi ri karhi swi n'wi hehla. Loko, a va fanele ku va va ri karhi va n'wi chavezela. Kambe a va ri karhi va n'wi hehla hi ku va mudyohi wa le xihundleni, va n'wi hehla hi ku va muwi.

<sup>68</sup> A ku ri hi awara liya yikulukumba, a ku ri hi nkarhi luwa wukulukumba, a ku ri nkarhi laha Xikwembu xi nga yisa Yobo eka misava yo kwetsima; laha Xi yisaka mupfumeri un'wana na un'wana, eka ntokoto, etlhelo ra le ndzhaku ka mananga, kukotisa hilaha Xi nga endla Muxe; eka xindhawana xa le xihundleni, laha Xi nga ku yisa kona; edladleni ra malahla, laha ndzi nga Swi amukela kona. Xikwembu xi na ndhawu, na xikongomelo, na nkarhi. Kutani loko Xi vekile Yobo eka xiyimo lexi, Xi n'wi vekile emisaveni yo kwetsima, hikuva a Xi ya eku paluxeni ka swin'wana eka yena, leswi a swi nga ta pfuka swi yile ekule.

<sup>69</sup> Oho, hikokwalaho ka misava liya yo kwetsima! Xi fanele ku yisa n'wana un'wana na un'wana wa xiviri lahaya. Xi ku yisa etindhawini letiya, laha ku nga riki na javulosi loyi a nga ta kala a ta. A ku na mudyondzisi loyi a nga ta pfuka a Swi hlamusele ekule. Xi ku nyika nchumu wun'wana emisaveni liya le ndzhaku lahaya, leswi nga swa ntokoto, leswi u nga ta pfuka u nga swi rivalanga ntsena loko tinguva ti ri karhi ti khungulukela emahlweni; swi nga ri na mhaka leswaku mana wa wena a nga pfumeli ku va Xikwembu xi ri kona ku fika kwihi, papa wa wena, nuna wa wena, nsati, vanghana va wena, va nga va ka hakona. Mupfumeri un'wana na un'wana wa ntiyiso u na ndhawu yaleyo laha Xikwembu xi nga hlangana na yena kona. A ku na loyi a nga siyiwa ehandle. Mupfumeri un'wana na un'wana u na xona. Munhu un'wana na un'wana loyi a tswariweke hi Mfumo wa Xikwembu wa yi tiva ndhawu liya, minete liya, awara liya laha Xikwembu xi nga n'wi yisa kona. Nakona emisaveni liya yo kwetsima, eVukoneni bya xihlahla lexi pfurhaka, Xi endlile swin'wana eka mupfumeri yaloye, leswi dzano hinkwaro ra misava a ri nga ta swi herisa. "Ehenhla ka Ribye leri, Ndzi ta aka Kereke ya Mina, nakona minyangwa ya tihele yi ngaka yi nga Yi herisi." Ehenhla ka Ribye leri, nhlavutelo wa ximoya wa Yesu loyi a pfuxiweke! Ehenhla ka Ribye leri!

<sup>70</sup> Yobo, emaxangwini ya yena, swilo hinkwaswo swi fambile. Nsati wa yena a n'wi hundzukerile ku lwisana na yena, nakona a ri karhi a n'wi hehla. Nakona vanghana va yena hinkwavo va vapfumeri a va n'wi hundzukerile ku lwisana na yena hikuva a va ri na ntivo-vukhongeri ntsena. Kutani lavan'wana hinkwavo a va n'wi hundzukerile ku lwisana na yena.

<sup>71</sup> Kambe Xikwembu xi ku, "Tana haleno, Yobo. Ndzi ya eku ku nyikeni ka swin'wana, mufana. Ndzi ya eku hoxeni endzeni ka wena swin'wana leswi vajavulosi hinkwavo va tihele va nga ta ka va nga swi dzudzeli ehandle." Nakona eka . . . Mudyondzisi

un'wana na un'wana emisaveni a nga ha ku hehla, hi ndlela yin'we kumbe leyin'wana, kambe swi nge pfuki swi sukile. Wa swi tiva leswi xi nga swi endla? Ntsena xi lo tlakusela khetenisi ehenhla swintsongo, kutani xi ku, "Yobo, langutisa lahaya!" Kutani xana Yobo u vonile yini? Xana u ehleketa leswaku u vonile yini? U vonile Paseka, eka nkarhi wa yona wo rhanga. U vonile Paseka yo rhanga, kutani a kalakala, "Ndza swi tiva leswaku Mukutsuri wa mina wa hanya!"

<sup>72</sup> Oho, i ndhawu yo kateka njhani ku va kona! Wanuna un'wana na un'wana loyi a hlawuriweke hi Xikwembu, na wansati un'wana na un'wana na n'wana, u ta eka ndhawu yaleyo emisaveni liya yo kwetsima, ku ya laha Xikwembu xi tlakusaka khetenisi kutani u N'wi vona eka matimba ya Yena ya ku pfuka. Wa swi tiva leswaku Wa hanya. Kutani hina, tani hi Yobo, hi nga ha rila, "Ndza swi tiva leswaku Mukutsuri wa mina wa hanya, nakona emasikwini yo hetelela U ta yima emisaveni. Hambi loko swivungu swa nhlonge swi onha miri lowu, hambiswiritano ndzi ta vona Xikwembu ndzi ri enyameni leyi."

<sup>73</sup> Mbono luwa wo rhanga wa Paseka wu endlile muprefeta a huwelela. Kutani tindlati ti vombie, na rihat i hatimile. U vonile Paseka, nkarhi wa yona wo rhanga. Xana u yi vonile rini? Ku nga ri loko a ha ambarile swiambalo swa yena leswi nga hlaysia kahle; ku nga ri loko a ha kamile misisi ya yena, kumbexana, hi vukheta; ku nga ri loko a ha tiphina hi rihanyo lerinene ku tlurisa. Kambe loko a ri ekhombyeni, loko a tshamile ekhombyeni, eka awara, nakona hakanyingi ya rifu ra yena, kwalano hi kona laha a nga vona Paseka. Kwalano hi kona laha a nga vona ku pfuka ko rhanga.

<sup>74</sup> Oho, swi vile leswi yelanaka eka mina na wena. Ku vile loko hi tshamile ealtarini, kun'wana, kukondza hi va lava lulameleke ku fa, kutani hi ku, "Hosi Xikwembu, endla swin'wana eka mina!" A ku ri nkarhi walowo laha Xikwembu xi nga tlakusa khetenisi kutani hi vona Paseka.

<sup>75</sup> Hi vona Paseka, ku nga ri hi ndlela ya ntivo-vukhongeri, swonghasi. A hi se tshama hi vona Paseka, tani hi ku ambala swiambalo leswintshwa. A hi se tshama hi vona Paseka, tani hi swimpfundlhani na matandza ya mihlovo-hlovo. Hi vona Paseka eka matimba ya ku pfuka ka Hosi Yesu Kreste. Yaley a yi ri Paseka ya xiviri.

Kutani loko a huwelerile, Xikwembu xi hlamurile endzhaku hi Ndzilo.

<sup>76</sup> A ku ri Davhida loko a tava a tsan'wiwile na ku yisiwa evuchavelawhawha. A ku ri Davhida, endzhaku ka loko a ta va a dyohile na ku endla vugevenga lebyiya byo chavisa. A ku ri Davhida loko a pfilunganyekile na jaha ra yena ri tekiwile, ntsako wa mbilu ya yena. A ku ri Davhida, muprefeta na hosi, loyi a nga rila loko a ta va a vonile leswaku u le ku khalabyeni,

nakona a fanele ku tlhelela endzhaku entshurini wa misava. A ku ri Davhida loyi a nge te, "Hambiswiritano, nyama ya mina yi ta wisa hi ku tshembha, hikuva A ngaka a nga pfumeleli Mukwetsimi wa Yena a vona ku bola, naswona a ngaka A nga siyi moya-xiviri wa Yena etiheleni."

<sup>77</sup> A ku ri loko Davhida a ri karhi a va na nkarhi wa yena wo tika ku tlurisa. A ku ri loko Davhida a pfilunganyekile na ku va emaxangwini, kutani hi awara yaliya ya rifu, hakanyingi, hi kona laha Xikwembu xi nga tlakusa khetenisi, xi ku, "Langutisa lahaya, Davhida!"

<sup>78</sup> Davhida u te, "Nyama ya mina yi ta wisa hi ku tshembha, hikuva A ngaka A nga tshiki mukwetsimi wa Yena a vona ku bola. Naswona A ngaka a nga siyi moya-xiviri wa Yena etiheleni, swingaleswi nyama ya mina yi ta wisa hi ku tshembha."

<sup>79</sup> Oho, swi va hi awara yaleyo, munghana. Swi va hi nkarhi walowo. Swi va hi letiya ta nkonka, tiawara ta ku vambiwa ku va hi vona ku pfuka. Swi va hi nkarhi walowo, laha Xikwembu xi rhandzaka ku kombisa tintswalo ta Xona. Swi va hi nkarhi walowo laha Xikwembu xi tsakelaka ku chavelela vana va Xona.

<sup>80</sup> Awara yo dzwihala ku tlurisa leyi misava leyi yi nga tshama yi yi vona a ku ri Good Friday; loko ku tshembha hinkwako, hinkwako loku a ku tsariwile, ku tshembha hinkwako loku a va ri na kona a ku ri loku a ku tsariwile ephepheni. Ku tshembha hinkwako loku a va ri na kona a ku ri loku nthlarhi yin'wana yi nga ku vula, nakona hilahaya a ku ri na Hosana ya Vutomi yi ri karhi yi fa eMhandzini ya xihambano. A ku ri awara yo dzwihala ku tlurisa leyi misava yi nga tshama yi yi vona.

<sup>81</sup> Kambe Paseka yi humelerisile awara yo vangama ku tlurisa leyi misava yi nga tshama yi yi vona, hikuva ripfumelo-hava hinkwaro na ku kanakana hinkwako, na ku chava hinkwako, swi susuwile loko Xikwembu xi ta N'wi pfuxa.

Hikokwalaho ka yini yi dzwiharile? Xana i yini xi yi dzwiharisaka?

<sup>82</sup> A hi landzeleriseni, tani hilaha ndzi nga vula hakona xinkadyana lexi nga hundza, hi mayelana na swinyenyana, hi mayelana na swiluva. Hi mayelana na, leswaku hikokwalaho ka yini mikonwa leyintsongo ya Paseka yi baleka hi Paseka? Hikokwalaho ka yini swinyenyana swi yimbelela hi ximun'wana xa lembe? Hikokwalaho ka yini swihluke swi humelela? Swi hikokwalaho ko va ku ri eku teni ka ximumu. Xana i yini lexi swi endlaka? Hi Nyenyenyana, ntsena kwalomuya ka n'hweti yo tika ku tlurisa leyi hi nga va na yona, xixika a xi ri karhi xi ta ku ya emahlweni, nale mahlweni, nale mahlweni, nale mahlweni, kukondza xi teka ku ba ka xona ko hetelela, kutani xi tlhelela endzhaku, ku pfulela vutomi ndlela. Rifu ri tekile ku ba ka rona ko hetelela. Ri fanele ku tlhelela endzhaku na ku tshika vutomi byi va na ndhawu ya byona.

<sup>83</sup> Xana i yini lexi endlaka leswaku ku dzwihala loko ri nga se xa? Ku va ku dzwiharile ku tlurisa loko ri nga se xa. Ha byeriwa, hi vativi va sayense, leswaku i ku vonakala loku tshikelelaka, ku ya emahlweni, ku ya ehansi. Dyambu ri le ku tlakukeni ku rhendzeleka na misava. Ku vonakala ka rona ku le ku tshikeleleni ka munyama. Wu le ku endleni ka ku ba ka wona ko hetelela. Wu ngaka wu nga ha yimi. Munyama wu ngaka wu nga yimi evukoneni bya ku vonakala. Wu ngaka wu nga swi endlili. Ku vonakala ku khume ra timiliyonu hi ku tiya ku tlula munyama, swingaleswi ku vonakala na munyama swi ngaka swi nga tshami swin'we. Kutani loko ku vonakala ku sungula ku xa, munyama wu tshama ehansi kutani wu dzika. Ku wu tshikelela kun'we.

<sup>84</sup> Ntsena tani hi ku chela inki ebavhini ro—ro hlantswela leri nga tala hi blichi. Ntsena yi va yi nga ha ri kona. A ka ha ri na ku ntima ka inki loko yi cheriwile endzeni ka blichi. Yi hundzuka blichi, yona hi yoxe.

<sup>85</sup> Oho, yaleyo i ndlela leyi xidyoho xi nga xiswona. Loko xi hoxiwile endzeni ka Ngati ya Muponisi, ntsena xi va xi nga ha ri kona. Xi fambile. A swi hlamarisi ku va A te, "Xi le lwandle ra ku rivala." Bavhu ra blichi ya Xikwembu leri nga ta pfuka ri nga ha kumekanga. Ntsena xa mbumburheka. A xa ha ri kona. Yaleylo i ndlela leyi xidyoho xi nga hakona, loko u kala u bona ku pfuka ka xiviri na nxavo lowu nga hakeriwa hikokwalaho ka ku pfuka kwaloko.

<sup>86</sup> Munyama, wu ri karhi wu hlengeletana kun'we, hikuva ku nga ri khale wu ta nyamalala. Kutani xikan'we-kan'we loko ku vonakala ku ta, munyama a wa ha vi kona. Xana wu ya kwipi? Xana ku humelele yini eka vusiku lebyiya bya ntima, lebyi eka tiawara tintsongo leti nga hundza, a byi nembelela ku rhendzeleka na tabernakele ley? Ntsena byi ngaka byi nga vi kona sweswi. Dyambu ri le ku voningeni. Xana byi yile kwipi? I xiphemu xihi lexi byi nga xi tlakula, kumbe xana hi kwipi laha byi nga rhelela kona? A byi nga ha ri kona. Kutani xivangelo xa ku va ku dzwiharile, hikokwalaho ko va ku nga ri na ku vonakala.

<sup>87</sup> Nakona xivangelo xa ku va munhu yaloye a nga va nga na ntshembho, a ku nga va nga na ku pfuka eku feni. Kambe Paseka yi humelerisile ku pfuka eku feni. Sweswi munyama a wa ha ri kona. Ka Vonakala.

Hi ta famba eku Vonakaleni loku, ku Vonakala  
    loku ko saseka,  
Loku ku tako laha mathonsi ya mberha ya  
    ntsetselelo ya vangamaka;  
Voninga hinkwako ku rhendzeleka na hina, ni  
    vusiku ni nhlekanhi,  
Yesu, Rivoningo ra misava.

<sup>88</sup> Vusiku byi tshikelela ku ya emahlweni, kutani a hi vekeni sweswo sweswi eka tiko hinkwaro. Leyi i awara yo dzwihala ku tlurisa, awara yo dzwihala ku tlurisa leyi misava leyi yi nga se tshamaka yi yi vona. Hambi wu ri ntumbuluko wa rhurhumela. Hi xinkadyana xin'we, misava leyi hinkwayo yi nga ha ya eka mapa. Xana ku nga humeleta yini hi mpfindluko eka... hi mpfindluko wa hayidrojeni kumbe—kumbe—kumbe okisejeni, kumbe yin'wana ya tibomo letiya tikulukumba, mpfindluko wa athomiki? Minsinya hinkwayo, byanyi hinkwabyo, swilo hinkwaswo, swirho hinkwaswo, swikongomelo hinkwaswo, vanhu hinkwavo, swilo hinkwaswo, ntsena swi nga tshoveleleka swi va swiphemu-phemu kutani swi tlhelela endzhaku eka tiasidi. Wa swi vona leswi swi nga swona? Misava hinkwayo yi le ku rhurhumeleni. Ku na tibomo leti nga lungheka.

<sup>89</sup> Swilo hinkwaswo swi tikomba swi vekiwile hi ku lulama hi nkarhi. Kutani loko ku ri leswaku munyama wu na nkarhi wa wona lowu nga vekiwa, xana i kangani laha ku Vonakala ku nga vekerika ka kona!

<sup>90</sup> Xana i yini xi ku endlaka ku dzwihala swonghasi sweswi? Xana i yini lexi endlaka swilo leswi? Tikereke hinkwato ti herisa xinakulobye. Hi le ku holoveni. "Oho, hi lahaya? Mina ndzi Mumethodist. Mina ndzi Mupresbyterian. Mina ndzi Mupentekostal. Mina ndzi church of God. Mina ndzi Muassemblies." Oho, xana a mi swi voni, vana? Loko ku ri leswaku sweswo hi hinkwaswo leswi a hi fanele ku yima eka swona, a hi ta va hi ri vanhu vo hlupheka ku tlurisa emisaveni.

<sup>91</sup> Ndzi tsakile swonghasi hikokwalaho ka leyintsongo, ndhawu yo kwetsima, ndhawu leyintsongo ehansi laha eOhio Avenue, emukhukhwini wa malahla, vusiku byin'wana, laha Xikwembu xi nga tlakusela khetenisi ehenhla. Mamethodist, Mabaptist, Mapresbyterian, Mapentekostal, hinkwavo va haherile ekule nkarhi wa kona, hikuva ndzi vonile Paseka. Ndzi vonile Yesu tani hi Muponisi wa mina. Ndzi N'wi vonile tani hi ku pfuka na Vutomi. "Loyi a pfumelaka eka Mina—Mina, hambi loko a file, u ta tlhela a hanya. Mani na mani loyi a hanyakutani a pfumela eka Mina a nge pfuki a file." Ndzi N'wi vona tani hi Hosi na Mufumi un'we ntsena, nchumu wun'we ntsena lowu nga ndzi pfunka, Munyiki un'we ntsena wa Vutomi lebyi nga Heriki, Un'we ntsena loyi a nga horisaka vuvabyi bya mina, loyi a nga susaka vuvabyi bya mina, Loyi a nga ndzi pfuxaka hi masiku yo hetelela. Ntsena xi ndzi pfumelerile ku langutisa ku hundza eka khetenisi, kutani ndzi N'wi vona, ku pfuka. Kutani ndzi tihlanganisile na Yobo, "Ndza swi tiva leswaku Mukutsuri wa mina wa hanya!" Kutani endzhaku ka lahaya a ka ha ri na Mumethodist, kumbe Mubaptist, kumbe Mupresbyterian, kumbe Mapentekostal, Mukutsuri wa mina u ta tama a hanya ku yisa emahlweni ntsena hilaha ku fanaka.

<sup>92</sup> Mi nga ha vula leswaku, “Kunene, leswi swi hi ndlela *leyi*, nakona sweswo swi hi ndlela *yaleyo*; handle ka loko u endla *leswi*, handle ka loko u endla *sweswo*.”

<sup>93</sup> Ndzi tiva ku antswa, hikuva ndzi langutile ku hundza eka khethenisi ra nkarhi. Ndzi vile kona emisaveni yo kwetsima; na mupfumeri un’wana na un’wana lahawani. A ku na javulosi loyi a nga yi khumbhaka misava yaleyo. A ku na dokodela ra ntivo-vukhongeri loyi a nga yi hlamuselaka ekule. U ndzi horisile loko ndzi vabya. U ndzi ponisile loko ndzi lahlekile. U hanya hilaha ku nga heriki.

Mi ndzi vutisa hilaha ndzi swi tivaka hakona  
leswaku Wa hanya?  
U hanya endzeni ka mbilu ya mina.

A nga fanga, kambe U pfukile eku feni.

<sup>94</sup> Kutani munyama lowu wukulu wu nga eku nembeleleni ehenhla ka misava sweswi, a hi nchumu kambe i ku tiyisisa leswaku ku Vonakala lokuya ku le ku tshikeleleni endleleni ya Kona yo ya ehansi.

<sup>95</sup> Loko rifu ri ri karhi ri nembelela ekusuhi swonghasi, leswaku ri nga va kona hi awara. Eka awara yin’we ku sukelka sweswi, misava yi nga ha hlangana na rifu ra yona. Loko rifu ri nembelela ekusuhi hi ndlela yaleyo, xana i yini lexi nga eku swi endleni? I Vutomi, Vutomi byi le ku teni; ku pfuka, Paseka eka vana hinkwavo va Xikwembu. Byi nembelela ehansi. Byi le ku tshikeleleni. Tintsumi ti le ku teni ehansi. Moya lowo Kwetsima lowukulu wu le ku ngheneni. Munyama wu le ku endleni ka matshalatshala ya wona yo hetelela, hikuva ku Vonakala ku ta va kona ku nga ri khale. Kreste u ta ta, ntsako na ntshembho wa tinguva, ku pfuka ka xiviri ka vapfumeri hinkwavo. Hikuva hi ta avelana na Yena eku pfukeni ka Yena, tani hilaha hi nga avelana na Yena eku xanisekeni ka Yena. “Loyi a xanisekaka na Mina u ta fuma na Mina.”

Oho, kutani, xana ndzi fanele ku rhwariwa ku  
ya eKaya eTilweni hi mubedo wa swiluva wa  
ku olova,  
Loko van’wana va lwile ku hlula nxavo na ku  
tluta ku hundza hi le malwandle ya ngati?  
Ee, ndzi fanele ku lwa loko ku ri leswaku ndzi  
fanele ku fuma. Andzisa xitiya-nhlana xa  
mina, Hosi.

<sup>96</sup> Xexo i xikhongelo xa mina. Oho, a ndzi fanelanga ku famba tani hi toya. A ndzi fanelanga ku famba hi ku rhendzeleka, hi masiku, na nhloko ya mina yi korhamele ehansi, tani hiloko swin’wana swi chavisa. Loko ndzi langutisa misava na munyama wa yona hinkwawo, na hinkwako ku ya emahlweni ka vona; ndzi fanele ku tlakusa nhloko ya mina, ndzi famba na nhloko ya mina yi ri exikarhi ka magama, ndzi ri karhi ndzi tiva leswi, leswaku,

“Ndza N’wi tiva eka matimba ya ku pfuka ka Yena.” Hikuva Wa hanya, na hina ha hanya. Hikuva U pfukile eku feni, na mina ndzi ta pfuka. Na wena u ta pfuka. Sweswo hi leswi Paseka yi vulaka swona eka mupfumeri.

<sup>97</sup> Nkarhi wun’wana lowu nga hundza, ehenhla e... Nyimpi ya Misava yo rhanga a yi ri karhi yi ya emahlweni. A va ri na tigese to tala leti va nga ti hoxa, to tani hi mastadi na gese ya kolorayini, nakona a ti ri na khombo. A ti ta va chefu eka swilo hinkwaswo. Matluka a ma ta fa, minsinya a yi ta fa, na byanyi a byi ta fa, swilo hinkwaswo, laha gese liya (gese ya mastadi) a yi ta pfurha kona loko va yi hoxile.

<sup>98</sup> Mufundhisi, mixo wun’wana wa Paseka, a ri karhi a rhelela ku hundza hi—hi matende laha lava nga vaviseka na lava nga eku feni a va ettele kona.

<sup>99</sup> Muongori wa Xihambano xo Tshwuka u tile hi ku longoloka. Vafana va vile emahlweni enyimpini nkarhi wo leha swonghasi, ehandle lahay, ntsena a va karhele swonghasi. Kutani a ri na—na xikatsa xa swiluva evokweni ra yena, kutani loko a ri karhi a hundza eka xibedwana xin’wana na xin’wana xa muvabyi laha vafana a va ettele kona, va ri karhi va rila. A ku ri Paseka. A ku ri Paseka muni eka vona; swihaha-mpfhuka a swi ri karhi swi famba ehenhla, na tibomo ti ri karhi ti cukumetiwa! A ta teka xiluva kutani a xi nyiketa eka un’wana na un’wana wa vafana, a ku, “Xikwembu xi ku katekisa. Xikwembu xi ku katekisa, makwerhu.” Masocha lawaya a ya ta omba xiluva lexiya kutani ya kalakala, hikuva a ya swi tiva leswaku xiluva lexiya a xi byariwile etikwensi leri va humaka eka rona.

<sup>100</sup> Makwerhu, mixo lowu, hi le misaveni ya tigese ta khombo swinene. Hi le misaveni laha tinxaka hinkwato ta tidyondzo na swilo, leswi nge, “A ku na ku pfuka. Nakona a ku na ku horisa ka Vukwembu. A ku na *leswi*, kumbe *sweswo*, kumbe *leswin’wana*.” Kambe, ku nga ri muongori wa Xihambano xo Tshwuka; kambe Moya lowo Kwetsima wa ta hi ku longoloka, kan’we swa xinkadyana, kutani wu hi tisa ehenhla ka misava liya yo kwetsima ya tintswalo ta Xikwembu, kutani wu chela endzeni ka timbilu ta hina mfungho lowuntsongo lowu humaka eTikwensi leri nga entsungeni wa nambu.

<sup>101</sup> U te, “Muchumayeri, munghana,” a ku, “Ndzi yimile kwalahaya kutani ndzi humesa mihloti, kukondza ndzi humesa mihloti swonghasi, kukondza ndzi ku... Un’wana wa vafana a ri karhi a ya eka xithuthuthu, ehandle ku ya emintileni ya le mahlwени enyimpini, ehandle ku hundza La Salle, Lorraine, nakona u vule leswaku a ya ehandle lahay, ku ya endla muxaka wun’wana wa—wa vunhlori. Kutani a ku... Ndzi ku ka yena, ‘Sejeni, xana ndzi nga khandziya na wena?’ Yena a ku, ‘Kunene, mufundhisi, tlulela ehenhla.’ A ku, ‘U teka xa wena n’winyi...’

Ndzi ku, ‘Sweswo hinkwaswo swi lulamile. Ntsena ndzi nga swi tsakela ku khandziya na wena.’ A ku, ‘Kunene, tlulela ehenhla.’”

<sup>102</sup> A ku, “Hi khandziyile kukondza hi fika ehansi eka mananga lawaya yo kwalala, laha hambi ku ri vala ra byanyi kumbe nchumu wun’wana a wu nga ri kona.” Kutani a ku, “Loko a ha kunguhata switirhisiwa swa yena ehansi, leswaku a ta rhumela hungu endzhaku, kumbe swihi na swihi leswi a lava ku swi endla,” a ku, “Ndzi fambile hi ku rhendzeleka kwalahaya swintsongonyana. Ndzi ehlekete, ‘Oho, xana leyia hi Paseka yin’wana! Ehandle etikweni leri, laha tibomo ti nga mbundzumuxela tindlu ehansi, laha minsinya yi nga simuleriwa ehansi, hi maqlu ya xibalesa xa muchini, a ku na vala ra byanyi ri nga sala.’” A ku, “O Xikwembu, lexi i xifaniso xa misava leyia, rin’wana ra masiku lawa, loko xidyoho xi ta va xi endlile matshalatshala ya xona. Lexi xi ta va xi ri xifaniso.”

<sup>103</sup> Kutani a ku, “Miehleketo na mahlo ya mina—mina a swi kokiwe rinoko hi ribye ro karhi.” A ku, “Ndzi yile kwalahaya, kutani ndzi ehleketa, ‘Hosi, hikokwalaho ka yini U lava leswaku ndzi yima etlhelo ka ribye leri?’” A ku, “Ntsena ndzi tlakusele ribye ehenhla, kutani, loko ndzi swi endlile, konwa lowuntsongo wa Paseka wu yimiserile nhloko ya wona ehenhla. A wu hlayisiwile hinkwako ku hundza eka xidzedze. Hinkwako ku hundza eka tigese ta chefu, a ti yi karhatanga, hikuva a yi fihiwile eribyeni.”

<sup>104</sup> “Ndza swi tiva leswaku Mukutsuri wa mina wa hanya.” O Xikwembu, swi nga ri na mhaka leswaku misava yi ri yini, ndzi fihle eRibyeni ra Tinguva, Hosi. Loko swidzedze swi hundzile, ndzi pfumeleli ndzi tlakusa nhloko ya mina ku ya evuton’wini nakambe. Hikuva Wa hanya, na hina ha hanya. Xana mupfumeri a nga vula yini, loyi a nga va esaveni, loyi a nga va mbhoni ya swilo leswi? “Ndza swi tiva leswaku Mukutsuri wa mina wa hanya.”

<sup>105</sup> Kereke, misava, yi... va ya ekerekeni mixo lowu; vo tala va vona, ku ya kombisa jasi lerintshwa; van’wana va vona, ku ya kombisa xiggoko lexintshwa. A va nga ha va voni kukondza ku fika Paseka leyia landzelaka nakambe. Swi ya ehandle eka nkombiso wa misava na vuhava. Vo tala va vona va ya ekerekeni, ntsena ku ya tumbela endzhaku ka swidyoho swa vona na ku wela eka mavandla yo karhi lamakulu, kutani va ku, “Hi mina *Swingere-ngere*. Ndzi wela eka *Swingere-ngere*.” Sweswo hi swona hinkwaswo leswi va swi tivaka. Sweswo hi hinkwaswo leswi va nga swi pfumela.

<sup>106</sup> Kambe, oho, eka hina, mixo lowu, hi tintswalo ta Xikwembu, hi yimile eka ndhawu leyia Muxa a yimile kona; hi yimile eka ndhawu leyia Yobo a yimile kona; hi yimile eka ndhawu leyia Davhida a yimile kona; nakona hi kalakala hi rito ra hina hinkwaro, “Ndza swi tiva leswaku Mukutsuri wa mina wa

hanya, nakona hi masiku yo hetelela U ta yima emisaveni leyi; hambi loko swivungu swa nhlonge swi nga onha miri lowu, hambiswiritano, enyameni ya mina ndzi ta vona Xikwembu, Lexi ndzi nga ta xi vona hi ndzexe; mahlo ya mina ya ta vona, nakona ku nga ri ya un'wana. A hi tisanga nchumu emisaveni leyi; i vuahava na vutikukumuxi. I ntiyiso leswaku a hi humeseli nchumu ehandle. Hosi yi nyikile nakona Hosi yi tekile, a ku katekisiwe Vito ra Hosi.” Nchumu wun’we lowu a wu tiva, “Mukutsuri wa mina wa hanya!” Ku nga ri leswaku, “U ta hanya.” “Wa hanya,” sweswo i ku yisa emahlweni hi masiku. “Wa hanya!” Nakona hikuva . . . Yesu u te, “Hikuva Ndza hanya, na n’wina ma hanya.”

<sup>107</sup> A hi korhamiseni tinhloko ta hina, ntsena xinkadyana sweswi, eka xikhongelo xo pfala.

<sup>108</sup> Oho, namuntlha, mbuyangwana wa mina la hlakatiweke, munghana, loko u nga se tshama u ta eka ndhawu leyi! Oho, u ri, “Ndzi vile laha etabernakeleni, minkarhi yo tala, Makwerhu Branham.” Sweswo swi sasekile. Ndza swi khensa sweswo. “Oho, ndzi vile eka tikereke tin’wana. Ndzi twile tiministara ta kahle ti vulavula.” Sweswo swi sasekile. “Ndzi hlaya Bibele ya mina.” Sweswo swi tama swa ha ri kahle.

<sup>109</sup> Kambe xana u tshama u ta eka ndhawu liya laha Xi nga tlakusela khetenisi ehenhla, ndhawu liya yo kwetsima laha ntokoto wu nga ba mbilu ya wena; laha u swi tivaka leswaku Paseka a ku nga ri ntsheketo; laha u swi tivaka leswaku Paseka a ku nga ri Santa Claus, a hi nchumunyana lowu nga vumbeleriwa; laha u swi tivaka wena hi wexe, leswaku Wa hanya; nakona hikuva Wa hanya, na wena wa hanya? Loko u nga se tshama u va na ntokoto wa sweswo, lowu i nkarhi wa kahle ku tlurisa, emisaveni, ku pfumelela Xikwembu xi tlakusela khetenisi ehenhla, mixo lowu. Yesu wa hanya. U ntshuxekile, emisaveni, mixo lowu. Hi yena Muponisi wa wena namuntlha; a nga ha va Muavanyisi wa wena mundzuku.

<sup>110</sup> Kambe xana a wu se tshama u hlangana na ntokoto walowo? Loko swi nga ri tano, xana u nga yimisela voko ra wena ehenhla, kutani u ku, “Xikwembu, ndzi tsetseleli. Ndzi ta pfumela sweswi”? [Xivati lexi nga riki na nchumu eka thepi—Muhleri.] . . . munhu endzhaku lahaya, na voko ra yena. Xikwembu xi ku katekisa, nkulukumba, kwalano. Un’wanyana yimisa voko ra wena.

<sup>111</sup> Hinkwenu n’wina mi nga lahawani sweswi, lava va nga se va ka na ntokoto walowo, xana mi nga yimisa mavoko ya n’wina, mi ku, “Xikwembu, mixo lowu, hi ndlela ya Wena n’winyi ya Vukwembu. . . . A ndzi Ku kombeli kumbe ku Ku byela leswi u faneleke ku ndzi nyikisa xiswona, Hosi. Kambe, hi ndlela ya Wena n’winyi ya Vukwembu, Hosi, xana U nga ndzi yisa eka ndhawu liya laha nchumu wun’wana wu nga ta

humela embilwini ya mina? Ndzi vile na swiganga swa mina na swirhelelo swa mina, ku nghena ka mina na ku huma ka mina, nakona ntsena hi ku olova a ndzi koti ku yima ndzi tiya, hi ndlela yin'wana. Kambe pfumelela leyi yi va Paseka ya xiviri eka mina. Ndzi yise eka ndhawu liya, Hosi, etlhelo ra le ndzhaku ka mananga. Kwalahaya u vumba mbilu ya mina, ntsena sweswi. Kutani u ndzi nyika misava liya yo kwetsima yo yima eka yona, laha ku nga riki na dimoni, kumbe kuri hava nchumu, kumbe mani na mani a nga ta pfuka a vule xin'wana na xin'wana eka mina, ndza swi tiva leswaku i ya xiviri. Ndzi pfumeleli ndzi langutisa ku hundza eka khetenisi ra nkarhi, eka mundzuku. Hikokwalaho ndzi taka lahawani, mixo lowu, Hosi, ku ta kuma sweswo. Ndzi twile muchumayeri a ri karhi a ringeta ku swi hlamusela. Ndzi lava leswaku Wena u ndzi paluxela swona.”

<sup>112</sup> Xana u nga yimisa voko ra wena? Xikwembu xi ku katekisa, manana. Xikwembu xi ku katekisa, na wena kwale ndzhaku, wanuna lontsongo. Nakona Xikwembu xi va na wena. Eximatsini xa mina lahawani, lahaya evangweni ra le ximatsini. Eximatsini xa mina, xana mani na mani a nga ku, “Xikwembu, ndzi tsetseleli, ntsena sweswi.” Xikwembu xi ku katekisa, lahawani eka vangwa lerin'wana. Ina. Yimisa voko ra wena, u ku, “Xikwembu, ndzi tsetseleli.” Xikwembu xi ku katekisa, manana lontsongo.

Ndzi navela ekaya nakona ndzi karhele,  
nakona ndzi lava ku vona Yesu,  
Ndzi lava ku twa tibele to tsokombela ta  
hlaluko loko ti ba;  
Swi ta vangamisa ndlela ya mina nakona swi  
ta nyamalarisa ku chava hinkwako;  
Hosi, ndzi pfumeleli ndzi langutisa ku hundza  
eka khethenisi ra nkarhi.

<sup>113</sup> “Ndzi pfumeleli ntsena ndzi langutisa swintsongonyana, ndzi vona Yesu eku pfukeni ka Yena.” Xana ku nga va ku ri na un'wana loko ndzi nga se pfala hi xikhongelo sweswi? Ntsena tshembheka. Yimisa voko ra wena. “A ndzi se tshama ndzi va mbhoni ya nkhuvulo wa Moya lowo Kwetsima, Makwerhu Branham.” Sweswo hi leswi ndzi vulavulaka hi swona. Yaleyo i ndlela yi ri yoxe leyi u nga va ka mudyandzhaka wa xitshembhiso, i ku hundza—i ku hundza hi le ka nkhuvulo wa Moya lowo Kwetsima. Wa swi tiva sweswo. Sweswo i ku tswariwa ka wena. Yaleyo i misava ya wena yo kwetsima. Xikwembu xi ku katekisa, manana. Xikwembu xi ku katekisa kwale ndzhaku, jaha. Xikwembu xi ku katekisa, nkulukumba. Xikwembu xi ku katekisa, wansati. Xikwembu xi ku katekisa le ndzhaku. Sweswo swi lulamile. Xikwembu xi ku katekisa, tatana. Xikwembu xi ku katekisa, nakulorhi lontsongo.

Hosi, ndzi pfumeleli ndzi langutisa ku hundza  
eka khethenisi ra nkarhi.

Ndzi pfumeleli ndzi langutisa ku hundza eka khethenisi ra nhlomulo na ku chava,  
 Ndzi pfumeleli ndzi twa tibebe to tsokombela ta hhaluko loko ti ba;  
 Swi ta vangamisa ndlela ya mina nakona swi ta nyamalarisa ku chava hinkwako;  
 Hosi, ndzi pfumeleli ndzi langutisa ku hundza eka khethenisi ra nkarhi.

<sup>114</sup> [Makwerhu Branham a sungula ku hama *Ku Hundza Eka Khethenisi Ra Nkarhi*—Muhleri.] Loko u yimile eka ndhawu liya, laha u nga swi tiviki leswaku u le kwih! Ku vile na khume kumbe khume ntlhanu wa mavoko lawa a ya yimile. Ndza swi twa leswaku ku na yo tala. Emixweni lowu wa Paseka, hikokwalaho ka yini u nga yimisi voko ra wena kutani u ku, “Hosi, hi mina loyi. Kutani loko xidziva lexiya xi pfuriwa hi awara ya khume n’we, ndzi ta va ndzi ri endzeni ka mati lawaya, na mina. Ndzi rhelela kona eku khuvuriweni, leswaku ndzi ta pfuxiwa hi vuntshwa bya Vutomi, ku ta famba na Wena, Hosi. Ndzi lava ku langutisa ku hundza eka khethenisi ra nkarhi. Ndzi lava ku va na ntokoto sweswi, emixweni lowu wa Paseka, leswaku ndzi ta kota ku vula, nkarhi wun’wana na wun’wana evuton’wini, ‘Ina, A ndzi tshamile etabernakeleni leyintsongo ya biloko ya khale, mixo wun’wana wo saseka wa Paseka. Xikwembu xi tlakuserile khethenisi ehenhla. Ndzi langutisile ku hundza eka rona. Ndzi swi vonile leswaku kereke ya mina a yi nga vuli swo tala ngopfu. Ndzi swi vonile leswaku a ku nga ri na nchumu emisavemi lowu a wu vula swo tala ngopfu eka mina nakambe. Kwalahaya ndzi xavisile swilo hinkwaswo leswi a ndzi ri na swona. Ndzi xavile Rihlalu ra nxavo lowukulu. Ndzi amukerile Yesu tami hi Muponisi wa mina.’ Sweswi ndzi yimisa voko ra mina, Hosi Xikwembu. Ndzi tsetseleli. Xikwembu, ndzi lava ku langutisa ku hundza eka khethenisi ra nkarhi.” Xana ku nga va ku ri na un’wana loko ndzi nga se pfala sweswinyana?

<sup>115</sup> Xikwembu lexi rhandzekaka, lexi i xinkadyana xo xiximeka. Hi le ku tiphineni hi minkateko. Hi tiphinile hi Rito. Hi tiphinile ku tlula hilaha hi nga hlamuselaka hakona; Vukona bya Moya lowo Kwetsima, Lowu nga hi nyika xitiyisiso lexi xikulukumba, leswaku hi hundzile, nakona hi hundzile eka—eka rifu ku ya eVuton’wini. Nakona ku na lava va nga kona sweswi, Hosi, vo tala va vona, va yimisile mavoko ya vona. Lexi i xinkadyana xo xiximeka.

<sup>116</sup> Kumbexana va nga ha va va leteriwile exikolweni xin’wana xa swa vukhongeri. Va nga ha va va hisile makhandlhele. Va nga ha va va vuyelerisile swikhongelo, ehenhla ka vuhlalo. Va nga ha va va tihlanganisile na dinominexini yin’wana; va petiwile ematini hi ndlela yo karhi, va cheriwa hi mati ehenhla ka nhloko, kumbe ku haxiwa. Va nga ha va va vuyelerisile Mukhuva wa Vaapostola na ku hundza eka mihivahivani ya nkarhi na nkarhi.

Kambe a va kalanga va ta eka sava leriya ro kwetsima, a va kalanga va ta eka ndhawu liya kukotisa hilaha Yobo a nga endla hakona, kukotisa Muxe, kukotisa Abraham, kukotisa hilaha vana va Wena hinkwavo va nga endla hakona. A va kalanga va ta eka ndhawu liya kukotisa vadyondzisiwa lavaya va nga ya esirheni, emixweni luwa, kutani va kuma leswaku Ü fambile.

<sup>117</sup> Va nyike, Hosi, sweswinyana, lavaya va nga yimisa mavoko ya vona, leswaku Moya lowo Kwetsima lowukulu wu ta ta etimbilwini ta vona kutani wu endla ntirho lowu wukulu lowu sweswi hi wu kombelaka. Hi yingise, Hosi. I va Wena. Hi vona mihadzu ya Hungu. Ndza khongela leswaku U ta va katekisa, hi ku saseka. Va nyike nkhuvulo wa Moya lowo Kwetsima, namuntha.

<sup>118</sup> Nakona a hi swi tivi, hi nga pfuka hi nga ha vonanga Paseka yin'wana. A ku na ku kanakana leswaku ku na van'wana lahawani lava nga taka va nga swi koti; ku nga ri Paseka yo kotisa leyi, Paseka tani hi xitsundzuxo. Kambe, Hosi, ingaku va nga vona Paseka ya xiviri, yona yaleyo, Hosi, laha mimiri ya vona yi nga ta vumbeka hi xivumbeko xa wanuna lontsongo kumbe wansati, nakambe, va humelela ku suka esirheni, ku ta hanya hi masiku.

<sup>119</sup> Va katekisi, Hosi. I va Wena. A ku ri Wena Loyi a nga va koka. Hikuva ku tsariwile leswaku, "A ku na munhu loyi a nga taka eka Mina, handle ko va Tata wa Mina a rhanga a n'wi koka." Sweswi i va Wena, loko ku ri leswaku U va kokile. Loko U ri ekusuhi swinene na vona, ku kokela mavoko ya vona ehenhla emoyen, U le kusuhi swinene ku va u endla ntirho lowun'wana hinkwawo. I va Wena, Tatana. Hi nyike leswaku lowu wu ta va nkarhi wa ku rhula eka vona.

<sup>120</sup> Ndza Ku khensa eka hinkwavo lava nga endla xiboho xa vona khale, na ku va va vile na ntokoto wa vutomi lebyintshwa, va yima emisaveni yo kwetsima. Hi lahawani ku ta titsakela na vona mixo lowu, eka mintshembho ya ku Vuya ka Hosi Yesu, loko na hina hi ta—hi ta va na xinakulobye na Yena, eku pfukeni ka Yena, tani hilaha hi nga va na xinakulobye eku xanisekeni ka Yena. Hi nyike swona, Hosi. Ingaku Moya wa Yena wu nga hi rhangela na ku hi letela, loko hi ri karhi hi famba ku ya emahlweni.

<sup>121</sup> Hi nyike xikhongelo xa kahle, sweswi, hi hafu ku bile awara ya nkaye, Hosi. Kutani xikan'we-kan'we u horisa vavabyi na lava xanisekaka.

<sup>122</sup> Ingaku lavaya vo ka va nga se petiwaka, va nga ta esirheni mixo lowu, va ya ehansi, kutani va tlhela va pfuka nakambe esirheni ra mati lahawani, Hosi, swi lerisiwile hi Hosi ya hina. Endzhaku ka ku pfuka ka Yena U vonakarile kutani a ku, "Fambani emisaveni hinkwayo, mi ya chumayela Evhangeli.

Loyi a pfumelaka kutani a khuvuriwa u ta ponisiwa.” Hi nyike, Hosi, kutani swi ta va tano.

<sup>123</sup> Hi nyike vusiku bya kahle, vusiku lebyi. Swi endli, Tatana, ku hi nyika siku ra kahle. Ingaku hi nga tiphina nkarhi wo leha hi Vukona bya Xikwembu. Hikuva hi swi kombela hi Vito ra Yesu. Amen.

<sup>124</sup> Ntsena i nchumu wun’wana hi mayelana na risimu leriya ra khale, ntsena ri endla swin’wana eka mina! Loko munyama wu famble, xana ku humelerile yini? Ku vonakala. A hi ri yimbeleleni sweswi, eku kwetsimeni ka Xikwembu. Un’wana na un’wana, kun’we sweswi.

Oho, hi ta famba eku Vonakaleni, ku Vonakala  
ko saseka,  
Ku ta laha mathonsi ya mberha ya ntsetselelo  
ya vangamaka;  
Voninga hinkwako ku rhendzeleka na hina, ni  
vusiku na ni nhlekanhi,  
Yesu, Rivoni ra misava.

<sup>125</sup> Loko A humeleta emixweni wa Paseka, U tshovile munyama hinkwawo; ntsena wu balekela ekule. Sweswi U yima tani hi Rivoni. “Hi mina ku pfuka na Rivoni, ku pfuka na Vutomi, ku pfuka na vutomi endzhaku ka rifu.” Hinkwaswo eka hinkwaswo swi le ka Yena.

<sup>126</sup> Xana a mi N’wi rhandzi-ke? [Nhlengeletano yi ku, “Amen.” — Muhleri.] Xana i vangani lava N’wi rhandzaka? Yimiselani mavoko ya n’wina ehenhla, ehenhla swinene. Sweswo swi kahle.

<sup>127</sup> Qhavulana hi mavoko na munhu un’wana loyi a tshameke etlhelo ka wena, loko hi ri karhi hi yimbelela nakambe. “Hi ta . . .” Ku ya exineneni, ku ya eximatsini, ku ya endzhaku, ku ya emahlweni. “. . . ku Vonakala ko saseka.” [Makwerhu Branham a sukela xiteka-marito xa phuluphiti—Muhleri.]

<sup>128</sup> Swikhongelo swi ta landzela, sweswi, hi hafu ku bile awara ya nkaye, kutani ku ta va na xikhongelo xa ku chumayela, xikhongelo xa vavabyi. Xikhongelo xa ku khuvula xi ta sungula hi awara ya khume n’we. Hinkwenu n’wina mi lavaka ku khuvuriwa, hi ku petiwa; xidziva xi tatiwile. Ndzi ta tisa swiambalo swa mina. Hi ta va hi vuyile eka swa xinkadyana.

<sup>129</sup> Kutani, vusiku lebyi, i xikhongelo xin’wana vusiku lebyi, lexi landzelaka, layini ya ku horisa, Hungu, na layini ya ku horisa. Kutani hi ta vona . . . Kunene, vusiku lebyi i vusiku bya xilalelo etabernakeleni, nakambe. Hi ta swi vona; hi na nonganoko lowu hi wu khomeke swinene, swingaleswi hi ta fanela ku hatlisa sweswi. Fambani etindhawini leti mi nga nyikiwa tona, mi va na swo fihlula, kutani mi vuyela endzhaku, mi ri karhi mi titsakela.

<sup>130</sup> Loko hi ri karhi hi yima sweswi na ku yimbelela, “Wa hanya, Wa hanya, Kreste Yesu wa hanya namuntlha.” Hinkwaswo swi lulamile, Makwerhu Neville, xana u nga ta haleno.

Wa hanya, Wa hanya, Kreste Yesu wa hanya namuntlha!

U famba na mina na ku vulavula na mina ku longoloka hi ndlela yo lala ya vutomi.

Wa hanya, Wa hanya, ku ponisiwa ko hundzisiwa!

Mi ndzi vutisa hilaha ndzi swi tivaka hakona leswaku Wa hanya? U hanya endzeni ka mbilu ya mina.

<sup>131</sup> Sweswi, munhu un’wana na un’wana a vuli leswaku, leyikulu “Haleluya!” [Makwerhu Branham na nhlengeletano va ku, “Haleluya!”—Muhleri.]

Wa hanya, Wa hanya, Kreste Yesu wa hanya namuntlha!

U famba na mina na ku vulavula na mina ku longoloka hi ndlela yo lala ya vutomi.

Wa hanya, Wa hanya, ku ponisiwa ko hundzisiwa!

Mi ndzi vutisa hilaha ndzi swi tivaka hakona leswaku Wa hanya? U hanya endzeni ka mbilu ya mina.

<sup>132</sup> A hi ri yimbeleleni nakambe. Loko hi fika eka sweswo, “Wa hanya, Wa hanya,” a hi tlakuseleni mavoko ya hina eka Yena, kukotisa *xisweswo*. “Wa hanya. Wa hanya. Mi ndzi vutisa hilaha ndzi swi tivaka hakona leswaku Wa hanya? U hanya endzeni ka mbilu ya mina.” Munhu un’wana na un’wana sweswi.

Wa hanya, Wa hanya, Kreste Yesu wa hanya namuntlha!

U famba na mina, U vulavula na mina ku longoloka hi ndlela yo lala ya vutomi.

[Makwerhu Branham a vulavula na un’wana—Muhleri.]

Mi ndzi vutisa hilaha ndzi swi tivaka hakona leswaku Wa hanya? (Hinkwaswo swi lulamile, sweswi.) U hanya endzeni ka mbilu ya mina.

<sup>133</sup> Xana A nga kahle swinene? Lexi xo kwetsima, xinkadyana xo xiximeka sweswi, laha hi ntshuxiwaka, ku ya emakaya ya hina hikokwalaho ka swifihluto swa hina. Vuyelani endzhaku, mi titsakerile.

<sup>134</sup> Ndzi ya eku kombeleni, loko hi ri karhi hi korhamisa tinhloko ta hina, loko Makwerhu wa hina Foulst loyi a rhandzekaka a ri kona, ku suka eCanada, loko a nga hi ntshuxa hi rito ra xikhongelo. Makwerhu Foulst, loko u swi rhandza. 

*NDZA SWI TIVA LESWAKU MUKUTSURI WA MINA WA HANYA* TSO58-0406s  
(I Know My Redeemer Liveth)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Sonto ni mixo wa Paseka Dzivamisoko 6, 1958, eTabernakeleni ya Branham eJeffersonville, Indiana, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

XITSONGA

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Xitiviso Xa Mpumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangeli ya Yesu Kreste. Buku leyi a yi xavisiwi, yi humesiwa hi xikalo lexikulu, yi vekeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberiwa ku ti hlanganisa na:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)